

# Ils avats da la claustra da Mustér (Part 2)

Da l'erecziun da la claustra odierna al temp preschent

## Adalbert de Medell

\* ca. 1628, † 11 da favrer 1696 a Mustér, catolic, da Tujetsch. Figl da Joachim e da Cornelia nata de Castelberg, da Mustér. Nev da Conradin de Castelberg. Studis a Nossadunnaun ed al collegi da la Propaganda Fide a Roma, nua ch'el è vegnì ordinà sacerdot (1651) ed ha promovì en teologia (1655). El è vegnì elegì avat da Mustér gia il 1655. A l'entschatta da ses mandat en 14 plaivs da la Surselva e trais filialas da quellas vegnidas separadas da l'investgieu da Cuira e suttemessas a la claustra da Mustér per sanar ils debits da la diocesa. Questa mesira ha dentant stuì vegnir revocada il 1660 causa l'opposiziun dal clerus sut guida oravant tut da Matthias Schgier. Sut la direcziun dad Adalbert de Medell en vegnids erigids l'edifizi claustral representativ en stil baroc e la curt claustrala a Trun (oz Cuort Ligia Grischa). Il dumber da commembers dal convent ha augmentà da set a 28.

Ursus Brunold

## Adalbert Defuns [de Funs]

\* 21 da schaner 1646 a Mustér, † 15 d'october 1716 a Mustér, catolic, da Mustér. Figl da Jakob. Scola claustrala a Mustér a partir dal 1659, profess benedictin a Mustér 1662, ordinà il 1668 e 1670. Scolast a la facultad teologica da l'abazia, plevon a Sumvitg 1680–87, avat da la claustra da Mustér a partir dal 1696. Defuns aveva contact cun l'erudit Jean Mabillon e cun auters maurins impurtants sco era cun Cölestin Sfondrati. Si'ovra principala, las «Annalas da la claustra da Mustér» (7 toms en furma da manuscrits) che cumpigliavan era in'istorgia retica, è vegnida destruida tras l'incendi dal 1799. Defuns ha er redigì texts davart temas filosofics, giuridics, retorics e teologics per il studi intern claustral. El ha scrit pregias e translà litteratura da devoziun en rumantsch, tranter auter «Sagira via tier il parvis [...]» (1751). Durant il temp d'uffizi da Defuns è vegnida construida la baselgia claustrala odierna.


Karin Marti-Weissenbach

## Gallus Florin [Deflorin]

\* 1663 a Camischolas (vischnanca da Tujetsch), † 14 da matg 1724 a Mustér, catolic, da Tujetsch. Figl da Durig (Ulrich) Deflorin. Profess 1680, durant la reconstrucziun da la claustra da Mustér. A partir dal 1685 studis da teologia en la claustra da Zwiefalten (Württemberg), ordinà sacerdot il 1687. Il 1715 è Florin daventà decan ed ils 27 d'october 1716 è el vegnì elegì dal convent avat da la claustra da Mustér e consecrà il prim da novem-

## Glista dals avats (17avel tschientaner fin oz):

- 1655–1696: Adalbert de Medell
- 1696–1716: Adalbert Defuns
- 1716–1724: Gallus Florin
- 1724–1742: Marian de Castelberg
- 1742–1763: Bernhard Frank von Frankenberg
- 1763–1764: Hieronymus Casanova
- 1764–1785: Columban Sozzi
- 1785–1801: Laurentius Cathomen
- 1804–1826: Anselm Huonder
- 1826–1846: Adalgott Waller
- 1846–1858: Anselm Quinter
- 1860/1877: Placidus Tenner (superior)
- 1861–1877: Paulus Birker
- 1880–1916: Benedikt Prevost
- 1916–1925: Bonifaz Duwe
- 1925–1963: Beda Hophan
- 1963–1988: Victor Schönbächler
- 1988–2000: Pancraz Winiker
- 2000–2012: Daniel Schönbächler
- 2012–: Vigeli Monn



Extensiuun maximala dal domini da la claustra da Mustér.

TENOR LIR

ber 1716 tras il nunzi apostolic. Il 1719 ha Florin empruvà da refurmar la vita monastica ed ha laschà batter atgna munaida (ses dretg sco si-gnur territorial). Ses plan da vender il signuradi da Vuorz ha fatg naufragi. Durant ses temp d'uffizi sco avat è vegnida terminada l'amplificaziun da la baselgia claustrala da Mustér.

Ursus Brunold

## Marian [Marianus] de Castelberg

\* 1669 a Mustér, † 28 da december 1742 a Mustér, catolic, da Mustér. Figl da Conradin, scrivant da la Lia Grischa, e dad Anna nata Tyron. Il 1687 è Castelberg entrà en la claustra da Mustér ed il 1693 è el vegnì ordinà sacerdot; pader OSB. Econom a Trun e da la claustra da Mustér, alura decan ed a partir dal 1724 avat. En ses temp d'uffizi ha el sustegnì fermamain la politica pro-austriaca da sia famiglia. Quest'orientaziun politica ha provocà las refusas da las dieschmas (partind da la vischnanca pro-franzosa da Breil) ch'han manà il 1737 a l'aboliziun definitiva da las dieschmas en la Cadi. Il medem onn ha Castelberg remess ses uffizi ed il 1742 ha el era renunzià a la dignitad d'avat.

Ursus Brunold

## Bernhard Frank von Frankenberg

\* 7 d'avrigl 1692 a Puntina, † 11 da favrer 1763 a Mustér, catolic, da Puntina. Figl da Josef, secretari da regiment da l'Austria Superiura, e da Maria Caecilia nata Höfferin. Entrada en l'abazia benedictina da Son Gagl 1707, profess 1710, ordinaziun 1716. Magister da filosofia e teologia a Son Gagl. Studi dal dretg canonic a Roma 1729, dr. iur. can. Il 1742 è Frankenberg vegnì numnà coadjutor da l'avat da Mustér cun dretg da successiun ed il 1743 è el vegnì ordinà avat tras il nunzi Carlo Francesco Durini. Grond promotur da la liturgia monastica, giurist e politicher da renum. Autur dad ovras teologicas e filosoficas. Stretg contact cun la curt habsburgaisa a Vienna. Il 1750 ha el avert in collegi da studi a Sunder. Frankenberg ha rinforzà il renum da la prinzi-abazia, ha procurà per urden e disciplina e protegì l'immunitad da la claustra.

Urban Affentranger

## Columban Sozzi

\* 14 da fanadur 1728 (Johann Martin) a Luorscha, † 23 da zercladur 1802 a Sunder, catolic, da Luorscha. Figl da Pietro Giacomo Aquilino e da Marta Lucia nata d'Alberti. Scola claustrala a Mustér, profess 1747. Studis en las claustras benedictinas da Mustér e da Son Gagl, ordinaziun sacerdotala 1753. Alura magister al collegi da l'abazia da Mustér a Sunder. Il 1764 è Sozzi vegnì elegì avat da la claustra da Mustér. Il sciencià enconuscent ha promovì la scola clau-

strala da Mustér ed è sa profilà sco politicher engaschà. Pli pauc success ha el gi cun la direcziun dal convent ed en fatgs economicos e finanzials. Suenter sia resignaziun sco avat il 1785, ha Sozzi vivi fin il 1797 en la prefectura da Mariaberg sper Rorschach, alura ha el instrui al collegi da Sunder.

Urban Affentranger

## Laurentius Cathomen

\* 11 da fanadur 1732 (Placidus Sigisbert) a Breil, † 9 da favrer 1801 a Breil, catolic, da Breil. Figl dad Othmar, e da Barbara nata Columberg. Studis a Feldkirch, profess benedictin a Nossadunnaun 1757, ordinaziun sacerdotala 1759, alura plevon auxiliar e sacerdot dals pelegrins a Nossadunnaun. Cun l'autorisaziun da la Congregaziun svizra dals benedictins ha l'avat da Nossadunnaun nominà Cathomen il 1785 avat da Mustér. Consecrà avat il medem onn, suenter l'approvaziun da l'elecziun da vart dal chapitel claustral. Ils 6 da matg 1799 han ils Franzos mess il vitg e la claustra en tschendra; il pitschen convent è sa sparpaglià. Il temp d'uffizi da Cathomen è marcà da malsegerezas e da tendenzas da dissoluziun.

Ursus Brunold

## Anselm Huonder

\* 1 da favrer 1751 (Josef Andreas) a Sumvitg, † 9 da matg 1826 a Mustér, catolic, da Trun. Figl da Johann Jacob e da Christina nata Monn. Gimnasi a Mustér, studis da teologia a Son Gagl, profess 1769, primizia 1777, pader benedictin. Avat da la claustra da Mustér 1804–26 e sco tal il grond restauratur dal convent destrui dals Franzos il 1799. Il 1804 ha Huonder amplifitg la Scola da latin (Scola chantunala catolica fin il 1808). Ses plans da reconquistar



Avat Benedikt Prevost (1880-1916) vala sco il vair restauratur da la claustra.

ils bains claustrals en Vuclina e da romanisar il convent n'en betg reussids. Da l'autra vart è el sa fatg valair visavi la Cadi concernent il dretg da la claustra d'ertar («maun mort») e da martgadar immobiglias.

Adolf Collenberg

## Adalgott Waller

\* 4 d'october 1765 (Placi Modest) a Zignau, † 26 da mars 1854 a Mustér, catolic, da Trun. Figl da Giuli Anton, scrivant da la Cadi e viturin, e da Maria Catrina nata Genelin. Emprim pur e martgadant cun funcziun da scrivant assistent da la Cadi. Waller è entrà il 1793 en la claustra benedictina da Mustér ed è vegnì ordinà sacerdot il 1795. Stalter claustral 1795–1801, alura chaplon ed administratur da la Cuort Ligia Grischa a Trun (per in tschert temp era chaplon a Zignau ed a Nossadunna da la Glich/Trun). Ordinà avat ils 13 da settember 1826. Da ses temp è la Scola chantunala catolica vegnida transferida en la claustra a Mustér (1833–42). Ina deblezza corporala (perdita da la vesida) ha sfurzà Waller a sa retrair sco avat il favrer 1846.

Adolf Collenberg

## Anselm Quinter

\* 5 d'avrigl 1792 (Vigeli) a Bugnei (vischnanca da Tujetsch), † 5 da favrer 1858 a Mustér, catolic, da Tujetsch. Figl da Martin Casper e da Maria nata Wenzin, da Tujetsch. Pader OSB a la claustra da Mustér. Profess 1811, primizia 1814. Magister a la scola claustrala, beneficiat a Nossadunna da la glich a Trun 1826–33. Chaplon a Zignau 1839–46. Elegì avat ils 21 da favrer 1846, en ina perioda ordvart difficila: la claustra dumbrava mo paucs paders ed ils 28 d'october da quel onn è ella brischeda. Il 1850–56 ha Quinter integrà, suenter la reconstrucziun da la claustra, il seminari catolic, fundà da l'investg da Cuira suenter la fusiun da las scolas chantunals confessionalas a Cuira.

Adolf Collenberg

## Benedikt Prevost

\* 12 da mars 1848 (Johann Anton) a Müstair, † 13 da zercladur 1916 a Mustér, catolic, da Müstair. Figl dad Ulrich, pur, e da Rosa nata Conrad. Gimnasi dals franciscans a Bulsau, profess 1870 en la claustra dals benedictins a Muri-Gries (Bulsau). Ordinaziun sacerdotala a Trent 1871, pader OSB. L'investg da Cuira, Franz Constantin Rampa, ha pladi Prevost il 1880 sco priur e maister dals novizs en la claustra da Mustér ed ha surdà ad el la direcziun da la claustra. Il 1888 è el vegnì elegì dal chapitel claustral avat da Mustér. En ils onns 1895–99 ha el laschà eriger dad August Hardegger la baselgia da S. Maria en il stil neobaroc. En il gimnasi da la scola clau-

strala ha el introduci il 1913 la Gavla classa. Dal 1913–14 ha Hardegger restaurà il chor da la baselgia claustrala barocca. Prevost vala sco il vair restauratur da la claustra.

Urban Affentranger

## Beda Hophan

\* 12 da fanadur 1875 (Julius) a Feldkirch, † 26 da december 1964 a Mustér, catolic, da Näfels/GL. Figl da Fridolin e da Mathilde nata Stichl, dad Augsburg. Gimnasi dals gesuits a Feldkirch, profess OSB a Mustér 1894, ordinà il 1898. Studis da filologia classica a Friburg, dr. fil. I 1903. Magister claustral, prefect da l'internat 1916–20, avat da la claustra da Mustér dal zercladur 1925 fin a la resignaziun il matg 1963. Durant sia regenza ha Hophan pudì augmentar considerablmain il dumber da confrats: da 12 a 38 paders, da 9 a 23 fraters seculars. Il gimnasi è vegnì cumpletà (2 classes licealas) e la matura (tip A) è vegnida renconuschida dal Chantun (1936) e da la Confederaziun (1938, 1944 definitivamain). Cun la construcziun dal tract occidental è vegnì realisà il plan claustral dal temp baroc.

Adolf Collenberg

## Viktor Schönbächler

\* 8 da mars 1913 (Johann Baptist) a Nossadunnaun, † 18 da schaner 1996 a Mustér, catolic, da Nossadunnaun. Figl da Baptist, selvicultur, e da Karolina nata Kälin. Gimnasi a Mustér ed Engelberg. Entrà il 1934 sco noviz en la claustra benedictina da Mustér. Studis a l'Universitad da S. Anselmo a Roma, dr. teol., ordinà sacerdot 1938. Magister da grec e latin a la scola claustrala. Elegì surpriur il 1941, decan il 1952 ed avat il 1963 (resignà il 1988). Schönbächler ha refurmà bainspert la cuminanza en il spiert dal Segund Concil Vatican, introducind tranter auter la concelebraziun, l'equalitad tranter ils fraters ed ils paders e l'uraziun choral cuminaivla. Vicepresident da la Congregaziun benedictina 1967–85. Ses temp sco avat è marcà d'ina activitad da construcziun ordvart intensiva: tranter auter ospizi cun chaplutta sin il Lucmagn, ils novs stabiliments per la scola claustrala, Casa Pazzola, la reconstrucziun da la baselgia da S. Maria e l'installaziun dal museum claustral. Las vastas exchavaziuns archeologicas, exequidas sut Schönbächler en l'areal claustral, han mess l'istorgia tempriva dal convent en ina glich cumpletmain nova.

Adolf Collenberg

## Pancraz Winiker

\* 16 da december 1925 (Josef) a Beromünster/LU, † 25 d'october 2013 a Mustér, catolic, da Triengen/LU, burgais d'onur da Norcia (Umbria) 1988 e da Mustér 1989. Figl da Hermann, commerziant, e dad Emilie nata Halter, dad Emmen/LU. Gimnasi a Beromünster e Mustér. Entrada en la claustra da Mustér 1946, profess 1947, ordinaziun 1951. Studis da teologia a Lucerna ed en la claustra da Mustér. Magister a la scola claustrala 1951–90, dirigent 1970–90, subpriur 1972–88, maister dals novizs 1985–89. Elegì avat ils 15 d'avrigl 1988, consecrà ils 11 da zercladur 1988; avat resignat a partir dal 2000. Avat preses da la congregaziun benedictina da la Svizra 1991–97, cussegliaier da la claustra da Dormition a Jerusalem 2001–02.

Adolf Collenberg

## Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.